

LA USC DI LADINS – VENERDI' 2 DICEMBRE 2016

A Udin I Festival european de la mendranzes

Chest fin de setemèna con Suns Europe la zità del Friul se aur a la esprescions artistiches de mendranzes de duta Europa. I ladins raprezenté dai joegn “Berdon”

Èrt e mendranzes - L'é jà peà via en jebia prum de dezember SUNS Europe, Festival european de la èrts ti lengac de mendranza, l gran event “fi” de Suns ruà a la seconda edizion e endrezà a Udin da Radio Onde Furlane col sostegn de l'ARLeF.

Per trei dis tel Friul se de jouc performance de scritores, atores, regisc e musizisc, che porta tel “teatron”, l gran Teatro Nuovo Giovanni de Udine, sia esprescions ti lengac mendres de Irlanda, Faer Oer, Bretagna, Frisia, Pajes Catalans, Groenlandia, Galizia, Sapmi (Laponia), Chucokta, Galles, Scozia, Isola de Man e de la mendranzes sarda, furlèna e ladina.

Te la convinzion che la desvalianza linguistica sie no demò n derit e n arricchiment culturèl, ma ence na gressorsa creativa, Udin te chisc dis doventa donca na “Babele” de lengac, sons e contaminazions.

Scontrèdes, spetàcoi, letures, proiezioni, conzerc e ence cerces de saores con “SunsDoc”, caraterisea chest event “progressist” che vel portèr l Friul te mez a l'Europa.

Levent se sera sù la sabeda sera col gran concert, olache se podarà scutèr: Imlé con sie rap e pop gaelich irlandeis; Steso con sonorità eterees e ipnotiches dal gran nord; Familia Caamagno che mesceida en galego rock'n'roll, pop e r'n'b; Brieg Guerveno

autor, compositor, chitarist e performer tel lengaz breton. Dai raions orientèi più dalonc de la Russia rua Veronika Ushoilik, la tousa dal Čukotka da la ouse de òr e Gurude, ciantautor e performer de la Khakassia che laora a na vida creativa l ciant armonich de la tradizion siberiana. Amò da la Cornovaglia rua l ciantautor Rory McGrath e da la Frisia rua Norma, gran ciantarina. A chisc se jonta i venjidores de Suns Ladinia stat a Moena ai 19 de november: l furlan Doro Gjat e i ladins Berdon. A i sostegnir sarà ence n bel grop de fascegn, che i podarà ence chest'outa ge dèr sia stima te la votazion del public.